

DEO OPTIMO MAXIMO

UNI ET TRINO,

VIRGINI DEIPARÆ, ET S. LUCÆ
Orthodoxorum Medicorum Patrono,

QUÆSTIO MEDICO-CHIRURGICA,

QUODLIBETARIIS DISPUTATIONIBUS
*manè discutienda in Scholis Medicorum, die Mercurii vigesima-
quarta Martii anni M. DCC. XXXIV.*

M. GUILLELMO-JOSEPHO DE L'ESPINE,
Doctore Medico, Præside. *Auctore.*

*An post gravem, ab ictu vel casu violento, capitis contusionem, etiam
mediocriter suspectà cranii fracturà vel fissurà, cutis unà cum
pericranio ad os usque incidenda?*

I.

NASCI-NE erat tanti? infantiam, somnum, tempora cibi, potûs, & tædii si computes, pueri vix sumus senes jam videmur. Quisque tamen vult vivere: anus putida, miles ærumnosus; Iruş egens, senex calculosus, *podagricus*, *silicernius*. Media inter tormenta mortem deprecamur quocumque pretio fatum protelare avidi. Amaritudine sanitatem redimimus. Medicinam tutelarem Deam experiri cupimus cujuslibet pignoris dispendio. Jubet Medicina membrum rescari: tollitur: adeo dulce est sperare seriùs mori: Ferrum in viscera cruentum adigit? ignes inurit sauciis partibus? fiat: dummodò vivamus. Post gravem ab ictu vel casu contusionem terebra admovenda est? admotam sanatus gaudet æger. Incertum an admovenda? cutisque & pericranium unà evellenda censeas, ut liquidò constet quid sit agendum? Urite, inquit æger, secate, radite modò vivam. Apparatus sanè ipsà terebrà crudelior: at sæpè necessarius magis. Præceps quispiam è scalis aut loco edito cecidit? caput in lignum, ferrum aut lapidem, cranio duriora videlicet, impegit? vehemens sanè commotio. Totius cerebri moles immensa sedibus dimota suis divulsæque validè intùs contremuit reperculsa fortiter in parietes cranii? Forsan dissiluerunt & ipsi parietes fragminibusque (sanà extùs remanente cute) meninges torquent, vellicant, pungunt. Interdum sola adest contusio gravibus stipata symptomatis, etsi nulla adsit fissura aut fractura; aliquandò

utrumque reperitur. In arenâ consilium capere hoc opus hic labor.

I I.

FELIX qui potuit rerum causas cognoscere: Sapè satis felix qui tantum rem ipsam posset cognoscere. A gravi capitis percussione magnorum malorum nascitur Ilias. Nec plerumque majora apparent: sapè grandiora & præcipua latent intus: imò quæ latent ferè sola sunt vera mala: collisio scilicet substantiæ pulposæ cerebri in interiores cranii parietes, sugillatio, aut fractura in ipsis ossibus. Reliqua apparentia ut phrenitim Emphysema hæmorrhagias febrem & cætera, signa tantum & effectus habeto. Per hæc, si apparent omnia simul & gravissima, imminentem vaticinare mortem: si minora urgent aut pauciora, cave fidas infidæ paci. Ignis latet suppositus cineri dolofo. Ne temnas tamen signorum conjecturam. His magnitudinem mali præsertim experto & seni Medico conjicere datur. Ex dolore capitis acutiore, lancinante, cum stupore, tinnitu aurium, vomitu, cerebrum vehementer concussum, ibique nasci & ali abscessum judica. Ex frontis, oculorum, faciei intumescentiâ pericranium osque forsan ipsum valdè contusum credere est. His adde hæmorrhagias per nasum, illæsis in ictu partibus externis nasi, per oculos, per aures iisdem positis, cranium fissum vix dubitare licet. Spasimis miserè convellitur æger, delirat, truci aspectu terribilis è lecto furiosus exsilit: dura meningx fissurâ internâ etiamsi nihil in tabulâ cranii exteriori appareat, convulsa torquetur, At interdum Comate hæc omnia sopiuntur signa. Hic hæreret vel ipse Tiresias. Tunc judicium difficile. Paucis quos æquus amavit Omnipotens hæc omnia certâ datur assequi conjecturâ. Haud faciliè contusionem simplicem cutis cum levi & periculi experte commotione cerebri, ab ossis externæ tabulæ depressione discernas: contusionem externæ tabulæ ossis ab utriusque disruptione: fissuram internæ seu vitreæ solam quis adeò Lynceus ut pervideat. Abscessum vix post hebdomadas, menses, annos adesse evincas. Juvandæ rationi quàm benè, ô bone Deus, addidisti sensus. Non jam sibi placeat adeò nec superbiat *Ratio* de fallaciâ sensus arguendo. *Ratio* definit hic esse *ratia* nisi sensus veniat in consilii partem & auxilium.

II I.

LEVI tantum commotione exceptâ nullis gravibus stipatâ symptomatis in utroque casu confert incisa cutis ad cranium usque & detectum illico subjectum os, per incisionem pericranii. Si addit fractura, plaudes sane! At si osse nudato integrum os & sin-

cerum appareat ; putas grandè piaculum commississe nec ullâ lustratione abludum & vulnere simplici cutem affixisti : nec putes idcò os esse *exfoliationi* permittendum : coalescet vulnus paucorum dierum spatio : ac non sine magno agrotantis juvamine contusum forsan pericranium incisione relaxabitur , detumescet facies , venæ cum internâ parte cranii committentes exonerabuntur ; tabum seu sanguinem concretum evoment , & si intus adsit commotio & abscessus exterminabunt. At nisi remiserint dilucidè omnia symptomata cave vulnus coalescere permittas. Angulos plagæ , vel cruciatæ , vel stellatæ , vel cujuscumque figuræ plumaceolis sublevatos ab ossè arceas , ut si operæ pretium sit terebra tempore & loco admoveatur. Isthæc enim incisio vel remedium est gravium symptomatum ubi non adest fractura , vel indicium omnium certius fracturæ , si forsan adfuerit.

IV.

PRINCIPĪIS obsta , medicinam serò paraveris cum immedicabile per moram factum fuerit vulnus. Turpe Medico non tanti æstimasse malum quanti erat æstimandum. Malè excusatus valeat cum suo *non putabam* , cum potuit scire , inspicere , propriis manibus palpare. In re periculi plenâ attendendum , timendum , cavendum quidquid luctuosum magis & portentosum. Agendum quasi certa salus operam sequeretur. Omnia tuta time ; in deploratis numquam despera ; bonorum tamen verborum & promissorum haud prodigus indecenter. In negotio ancipiti viriliter operare quasi penès te foret eventus. Cautè rem age & providenter quasi omnia mortem intentarent. In cranio vehementer contuso cave fracturam , commotionem aut sugillationem , undè collectio materiæ stagnantis , corruptio , abscessus. Nec ideo sperare ac proinde agere te deterreat ingens accidentium cohors. Paucis quidem ex orci faucibus superas evadere ad auras , & ab ipso Averni limine remeare datum est : at quod pauci potuèrè , cur iste non poterit & iste manu auxiliatrice adjutus. Conare magna : permitte superis cætera. Unica via est incisio , quâ latens in ossè vitium detegas , eâ solâ obliquæ fissuræ fraudem revelabis. Interdum solo pericranii tritu , vomitus , convulsio , febris , phrenitis , oculorum spasmus , tetanus , &c. collisioni capitis superveniunt. Laxatâ per incisionem pericranii crispaturâ , hi motus inordinati fibrarum atque hæc tam gravia symptomata levi operâ compressa quiescunt. Nî remittant ulterius ferro aggredere ipsum os. Tunc otiosum spectasse naturam pigeret , & fecisse lætaberis quæ puderet non fecisse.

SERIOREM ergò poenitentiam dùm licet præveni catus, incisione prudenter & peritè pro ratione loci & magnitudine periculi factâ. Absit ut missâ faciam magna aliundè præsidia, ut frequentes & copiosas sanguinis missiones, diætâ exquisitam, & quæcumque valent sanguinem concretum intus & extus admota resolvere. Sæpè doctâ plus valet arte malum, & quamvis nihil horum omiseris, vix in vado constituitur æger. Quid? si neglexeris. Non me tunc emenforum quadraginta aut sexaginta dierum (post quos vita vulgò creditur incolumis & omnis periculi expers) elapsa series securum idè præstiterit. vel minimis symptomatibus adhuc perterrefiam. Minimus capitis dolor ubique, me iudice, abscessum minaretur. Nec crudelem me facere medicinam quisquam arguat. Crudeliter illum misericordem dicito, qui, dùm potest servare civem, metuit, mortem (grande sanè malum) levi malo propellere. Non in contusione, quam parva sequitur & externa tantùm sugillatio, secandam cutem, secandum proponimus pericranium; at ubi hæmorrhagia, faciei tumor, delirium, vertigo, &c. gravia comitantur symptomata, etiamsi, illasâ cute, certè non possit asseri fractum esse cranium, imò etiamsi cranium non esse fractum ferè pro certo habeatur.

Ergò post gravem, ab istu vel casu violento, capitis contusionem, etiam mediocriter suspectâ cranii fracturâ vel fissurâ, cutis unâ cum pericranio ad os usque incidenda.

DOMINI DOCTORES DISPUTATURI.

*M. Robertus-Hubertus
Linguet.*

*M. Hyacinthus-Theodorus
Baron.*

*M. Camillus Falconet, sa-
lubris Consilii Regis So-
cius, & è Regiâ Numis-
matum Academiâ.*

*M. Achilles-Francisus
Fontaine.*

*M. Ludovicus-Maria
Pouffe.*

*M. Hyacinthus-Theodorus
Baron, Facultatis De-
canus.*

*M. Joannes-Baptista-Lu-
dovicus Chomel.*

M. Antonius Casamajor.

*M. Joannes-Francisus
Coutbier, Scholarum
Professor designatus.*

Proponebat Parisiis **GASPAR COCHON DU PUY,**
Rupifortensis, Baccalaureus Medicus, A. R. S. H. 1734.
à sextâ ad meridiem.